

# d'Kopleschter Lidd

duergestallt vum Jängy Muller

„Mir sti fest zesammen am Weidendall...“ an „Déif hannert dem Briddel, do läit mäin Heem...“.



**Koplescht ...** „déif hannert dem Briddel“ **ëm 1920-30 - Coll. Willy Kemp**

Mat dëse Wieder fänken déi éischt an déi zweet Stroph vum „Kopleschter Lidd“ un.

Wa mir eis op de folgende Säiten iwwert „d'Kopleschter Lidd“ ënnerhalen, da musse mir versichen, eis an déi Zäit zrëckzeversetzen, wou et entstanen ass. Nëmme dann ass et méiglech, d'Lidd esou ze verstoen, wéi den Auteur et deemools geduecht a geschriwwen huet. Och nëmme da kënne mir d'Begeeschterung an de Stolz vun de Kopleschter Leit fir hiert Lidd begräifen.

Mir wëssen net genau, wéini d'Lidd fir d'éischt gesonge gouf, an den Urtext mat den Noute war bis haut nach net opzedreiw. Mir wëssen awer, dass et kuerz nom éischte Weltkrich fir d'éischt gesonge gouf - ëm d'Joren 1919 bis 1922, wéi de Paschtouer

Victor Weiss den Text vum Lidd fir seng Jonge vum Jünglingsveräi geschriwwen hat. D'Lidd ass bei de Kopleschter mat Begeeschterung opgeholl an no kuerzer Zäit den „Hit“ am Duerf ginn. Bei all Manifestatiounen a Fester gouf „d'Kopleschter Lidd“ aus voller Broscht an aus déiwer Iwwerzeugung vun de Kopleschter Awunner gesongen.

Wien ass nun de Paschtouer **Victor Weiss**, den Auteur vum Lidd?

Wat steet am Text?

Wat léisst sech eventuell tëschen den Zeilen erausliesen?

Wat sinn d'Hannergrënn vum Liddertext?

Wat wësse mir iwwert d'Melodie vum Lidd?

Op dës Froe probéieren ech, Äntwerten ze fannen.

Dir léif Lieser hutt wahrscheinlech nach aner Äntwerten, an ech loosse mech gäre vun ärem Wëssen inspiréieren.

Wat den Auteur Weiss selwer iwwert säin Text geduecht huet, ass eises Wëssens net bekannt. Mir kënne eis also nëmme virstellen, wat en Duerfpaschtouer, die vun 1916 bis 1923 den „Här“ am Duerf war, hätt kënne derbäi denken.

De **Victor Weiss** gouf den 21. Juli 1879 zu Esch/Uelzecht gebuer als drëtten a jéngste Bouf vun der Koppel Nicolas Weiss a Catherine



**De Victor Weiss als jonke Geeschtlechen**  
- Coll. Romain Pansin

Heinen (Heynen). Dem klengen Victor säi Papp huet bei engem Ongléck op der Schmelz säi Liewe gelooss, wéi de Jong 10 Joer al wor. Gedeeft gouf de Victor an der Par Sankt Jousef zu Esch/Uelzecht de 14. August 1879. Mat 12 Joer huet hien d'Éischt Kommioun gemeet a gouf de 14. August 1892 gefiermt. d'Primärschoul mécht en zu Esch, de Secondaire am Kolléisch zu Lëtzebuerg (gewunnt huet en am Konvikt vun 1895 bis 1900). E wor am Seminaire vu 1900 bis 1905 a gouf den 10.08.1905 zum Geeschtleche geweit. En ass den 3. Januar 1951 gestuerwen. Begruewe gouf hien a senger Gebuertsstad zu Esch/Uelzecht um Kierfecht vu Sankt Jousef.

De Geeschtleche Här Victor Weiss fanne mir no senger Wei:

Als Kaploun zu Lëtzebuerg/Hollerech vun 1905 bis 1916. Hei huet en Häerzleide bei him ugefaangen, dat e bis zum Rescht vum Liewe vill geplot huet.

Als Paschtouer zu Koplescht vum 1.10. 1916 bis 1923. Aus Gesondheetsgrënn huet hien no 7 Joer Déngscht wéinst der viller Aarbecht déi schwéier Par Koplescht mussen opginn. Hie gouf an déi kleng Par vun Eppelduerf versat. No dëser neier a vill méi liichter Par koum en am Joer 1929 als Paschtouer an d'Fiels. Wéinst sengem Häerzleiden, dat erëm staark zougeholl hat, huet en den 1.9.1940 och hei mussen ophalen an ass a Pensioun gaangen. Um Lampertsberg op Nr. 50, rue N.S. Pierret huet e seng lescht Liewensjore verbruecht an ass och hei verscheed.



**D'Doudesannonce vum Abbé Victor Weiss**

De Victor Weiss wor, wéi en 1916 op Koplescht koum, dat seng éischt Par wor, e schéinen a flotte jonke Geeschtlechen, dee ganz sportlech ausgesinn huet. Et ass duerfir net verwonnerlech, dass d'Jugend vun senger Person begehert wor. Hei en Auszuch aus